

Penghantar barang mengaku ugut bunuh ibu didenda RM3,500

KUCHING: Seorang penghantar barang dijatuhi hukuman denda RM3,500 di Mahkamah Majistret di sini, semalam selepas mengaku bersalah mengugut bunuh ibu kandungnya menerusi pesanan aplikasi WhatsApp, minggu lalu.

Majistret Syarifah Fatimah Azura Wan Ali menetapkan tertuduh, Joel Lanyieng Sylsvester Wielding, 26, untuk dipenjara lima bulan sekiranya gagal membayar denda.

Mengikut pertuduhan, lelaki itu didakwa melakukan ugutan jenayah dengan mengancam hendak membunuh ibunya, 63, dalam

satu kejadian pada 4 Ogos lalu, sekitar jam 10 malam di sebuah rumah di Jalan Datuk Stephen Yong di sini.

Pertuduhan dibuat mengikut Seksyen 506 Kanun Keseksaan yang membawa hukuman penjara sehingga tujuh tahun atau denda atau kedua-duanya sekali, jika sabit kesalahan.

Berdasarkan keterangan kes, mangsa (pengadu) menerima satu pesanan ringkas melalui aplikasi WhatsApp daripada tertuduh yang mengugut mangsa dan meminta wang tunai sebanyak RM600.

Sekiranya pengadu enggan atau tidak memberikan wang

tersebut, tertuduh menyangkan dia akan membunuh pengadu.

Fakta kes juga mendedahkan kejadian sebegini sering berlaku apabila tertuduh memerlukan wang.

Hasil siasatan mendapati tertuduh meminta wang daripada pengadu untuk membeli dadah dan juga bagi membayar permainan judi dalam talian.

Tertuduh juga dilaporkan meminta wang daripada pengadu setiap hari, menyebabkan pengadu berhutang dengan adik-beradik lain.

Sekiranya permintaannya tidak dituruti, tertuduh

akan mengugut hendak membunuh pengadu sama ada melalui perbuatan atau menerusi pesanan aplikasi WhatsApp.

Justeru, pengadu yang bimbang akan keselamatan diri dan ahli keluarga membuat laporan polis dan tertuduh ditangkap pada 8 Ogos lalu sekitar jam 1.15 petang.

Turut dirampas untuk dijadikan bahan kes adalah sebuah telefon pintar jenama iPhone 12 milik tertuduh.

Pendakwaan dikendalikan oleh Pegawai Pendakwa, Inspektor Mohd Adzmei Ahmad manakala tertuduh tidak diwakili peguam.